

Communicaziun allas medias digl cumegn da Surses (nr. 07-2016)

Surses: Igl grond project turistic stat avant ena nov'antschatta

Igl grond project turistic a Savognin ò da neir elaboro danovamaintg. Gl'è da tschartger novs investours ed en manader pigl bogn da divertimaint e hotel cun resort da vacanzas annecto. Igl team da project vign a luvrar anavant ve digl project ed er a far adattaziuns basignevas. Dantant vot igl cumegn da Surses pruar da realisar oters projects tgi son neir fatgs a curta vista.

Igl grond project turistic a Savognin cun bogn da divertimaint e hotel agl lai Barnagn scu er igl resort da vacanzas annecto a Viols, cun en volumen d'investiziuns da total var 100 milliuns francs, na so betg neir realiso scu previa. La planisaziun da detagl tranter igl sviluppader da project, igls investours ed igl manader n'ò betg savia neir terminada cun success ainfra taimp util, uscheia tg'igl investour principal austriac ddr. Manfred Moschner ed igls ulteriours investours on decidia da s'orientar otramaintg. Cun chesta retratga no vot igl investour principal pero betg sarar tot igls ischs, el giuditgescha igl potenzial dalla regiun e digl project anc adegna positivamaintg. Avant tgi scumanzar cun novs discurs ò igl project pero d'esser madeir per investours, damaias on tot igls detagls d'esser sclarias. La madrezza per investours so angal neir cuntanscheida cun ena collaboraziun strètga tranter investour e manader.

Gl'è da catter en nov manader digl stabilimaint

Siva dalla retratga digl investour ò igl cumegn, an consultaziun cugl sviluppader da project e possessour digls dretgs digl taragn, Ueli Feusi dalla Mufag SA, examino las pussebladads da manaders adattos. Chegl cun la fegnameira da contanscher schi spert pussebel la madrezza per investours digl project. Cun igl manader pussebel Rudolf Tucek, possessour digl hotel Cube a Savognin, ò igl cumegn termino ossa las discussiuns da project, cuncheigl tgi las tractativas gevan an ena direcziun tgi n'era pigl cumegn betg acceptabla.

Igl grond project na vign betg sutaro

Igl cumegn da Surses persista er anavant a chel grond project, tgi ò ena gronda impurtanza per la regiun da vacanzas. An collaboraziun cugl sviluppader duess igl project neir persequito anavant uscheia tgi el vign adatto per investours. Amprema prioritad ò la tschertga d'en manader e d'investours. La realisaziun digl grond project cun en volumen d'investiziuns da var 100 milliuns francs basegna ena planisaziun fitg pretensiosa e custevla. Pinavant è preveida ena optimaziun da construcziun e da concept digl project per contanscher ena reducziun digls costs. Oz na so igl sviluppader percheigl betg inditgier igl spazi da taimp per la realisaziun da l'investiziun.

Igl cumegn vot intensivar la realisaziun da projects turisticis pi pitschens

Igl cumegn da Surses na vot betg spitgier giu cun far navot anfignen tgi igl project grond a Savognin vign realiso. El vot nizigier igl taimp per catscher anavant la planisaziun e realisaziun da projects pi pitschens, tgi èn per la regiun pero betg manc impurtants. Tar chels totga per exaimpel en project gio lubia d'en hotel cun 4 steilas e ca. 70 letgs aint igl conturn Sandeilas a Savognin, en parc da velos aint igl territori da skis da Somtgant a Tigignas, igl angrondamaint digl center da cursa lunga a Rona scu er en project da hotel agl conturn Grava Savognin tgi è an planisaziun. Chels projects òn ena grondezza survasevla e son neir realisos pi spert. Els dattan impuls impurtants a l'economia indigena ed agl turissem. An madem mument augmainten els l'attractivitat dalla regiun per investours da projects pi gronds eventuels, scu per exaimpel chel per en bogn da divertimaint cun hotel e resort da vacanzas a Savognin.

Ulterieur sclarimaint Az dat igl incumbenso digl team da project:

Patric Vincenz

Veia Purmaglera 3

CH-7460 Savognin

Telefon: +41 (0)79 636 76 04

E-Mail: patric@vincenz.ch